



Cun sadellas e puding

Giuanna Caviezel

Ussa èsi anc pli evident: Nus essan propi fitg populars qua a l'Europeada. Il fracass cun las stgellas para da plaschair als auters. E noss umor, lez è cler. Da chantar avain nus anc adina betg chalà. Er l'imni da l'Europeada savain nus tuttas e tuts gia bainbaud ordador («Korooooška Korooooška lalalalala crucifix lalalalala»).

Las dunnas han dastgà giugar lur pli bel gieu dal turnier. Cun las Ladinass da las Dolomitas avain nus passentà in mument ballapeistic tut spezial. Quel ha cumenzà gia cun sa stgaudar. Lez avain nus numnadain fatg da cuminanza, per rumantsch e per ladin. Er la pausa avain nus fatg en in grond rudè. Suenter l'emprima mesadad eran nus Rumantschas a la testa cun 2:1. *Fabiola Vincenz*, ina da nossas meglras giugadras, ha fatg omadus gols. L'emprim gol è stà in assist da noss goli ed il segund in culp liber. En la segunda mesadad han las Ladinass alura anc fatg trais gols. Suenter il gieu hai anc dà ina pitschna «battaglia da sadellas d'aua». La duscha n'avessi en sasez gnanca pli duvrà.

Ils umens han puspè già la disfortuna da stuair giugar il suentermezdi, igl è dentant stà main chaud ed il sulegl è savens stà cuvert da nivels. Ils Rumantschs han mussà ina buna prestaziun cunter ils Aremuns ed han schizunt fatg l'emprim gol. *Marco Cavegn* (president dal CBR), che gioga uschiglio en il gol tar US Schluein, ha bunamain stgarpà la rait dal gol cun ses culp. L'assist è vegnì d'*Adriano Simonet* che fa part dals giugaders ils pli giuvenns da nossa squadra. Durant la segunda mesadad han ils Aremuns alura nizzegià duas da lur schanzas ed han gudagnà il gieu. Sch'ins giuditgescha l'entir gieu en moda objectiva, avessan ils Rumantschs merità la victoria.

Durant la tschaina ha Marco Cavegn mussà a nus co ch'ins tschitscha siador in mez puding cun la bucca senza stuair duvra in tschadun. Silsuentar èn er ils auters vegnids intimads d'empruvar lur fortuna. La meglra figura ha noss minister da cultura *Raffael Summerauer* fatg – el ha tschitschà siador l'entir (!) puding en ina giada, e quai senza far portgaria. Suentar tschaina hai dà in concert a Rückersdorf. Las giugadras ed ils giugaders eran da buna luna ed han fatg festa sco selvadis.

* La giugadra Giuanna Caviezel scriva quest'emna regularmain da l'Europeada, il campinadi da ballape da las minoritads linguisticas en Europa che ha lieu a Kärnten/Carinzia – tar la minoritad slovena.

* Dal rest, ils resultats dals gieus rumantschs da mardi suentermezdi che Giuanna Caviezel descriva èn uschia:

*

* Ils Rumantschs – Aremuns (Rumenia): 1–2

* Las Ladinass – Las Rumantschas: 4–2